

金石錄補

金石錄補卷二十六

崑山葉奕苞九來著

傳疑

鉅仲寶醫

劉原父先秦古器記作張仲寶簠歐陽公集古錄云  
張仲器四其銘文皆同薛尚功欵識云原父藏其器  
子錄其文張仲周宣王時人卽詩所謂張仲孝友是  
也呂大臨考古錄圖以隸書偏旁釋之從巨不從長  
當爲鉅趙明誠金石錄云鉅字雖見玉篇然古文與  
隸多不合黃順伯東觀餘論云鉅其勿反董弅廣川  
書跋云鉅之忍翻皆以張仲爲誤董氏又云方中医

字不與古文合原父釋曰寶医医于禮爲櫝所以藏  
弓弩矢也董又云古文医不從竹後人從竹者誤此  
器爲方銅匣類桶蓋爲龜古医之制也予按医又作  
医𠂔伯医以医爲医而欵識𠂔伯医又作医𠂔考古文  
医字方中作𠂔近医廣川云以古較之與簠同

伯庶父尊敦

銘曰伯庶父作王姑<sub>姜</sub>尊敦考古云稱姑婦辭也王  
姑夫之母也欵識云或謂王姑者王父之姊妹廣川  
曰謂吾姪者吾謂之姑禮有王父母無王姑伯庶父  
必齊之子也齊與姬姓世爲婚媾凡以國聘者在名  
爲太姜少姜在序爲孟姜叔姜在諡爲文姜宜姜穆

姜在國爲秦姜晉姜衛姜此以國繫姓故曰周姜使  
疑爲王之姑則以周爲諡矣而周之世未有以天子  
之國號爲諡者原文周字作月或釋井或釋丹詩云  
丹人之子顧野王所謂卽周字也

### 毛伯敦

集古作毛伯古敦欵識曰邾廣川曰邾伯宗器其子  
作也蓋敦銘有毛伯內門立及內史冊命邾又邾作  
朕皇考邾伯尊敦集古引史記武王克商尙父牽牲  
毛叔鄭奉明水此名鄭者毛叔伯者爵史稱叔者字  
也薛云此字從弁從邑弁史籀作敦曰疑其邾字  
無疑原父則同集古爲鄭考古云邾周大夫也廣川

曰傳云毛伯原伯文王之子原毛之後春秋毛伯錫  
魯文公命說者謂文王之子而當時無毛國使毛伯  
仍爲文王之子其受封在滅商後今日皇考龔伯則  
于鄭爲可疑

文伯碩父鼎

鼎二黃氏曰形制款識悉同參讀之可識者四十有  
三字銘曰惟六年八月初吉己子史伯碩父追孝于  
朕皇考釐仲王母舟母史伯周宣王臣伯碩父其字  
鄭桓公問王室于史伯者是也漢表于厲王宣王時  
皆書史伯疑其一爲美文耳古文舟與周同史伯周  
臣故稱其王母曰周母先釐仲而後周母則釐仲實

門外瓦屋覆之而黃長睿東觀餘論又云在洛宮前御史臺中堂前門外旣已無定所謂御史臺者未知卽漢之太學所改抑後代遷立于其中也况洛陽記之四十六枚不言爲漢爲魏伽藍記之堂前所列不分在東在西得無洛陽記但指漢碑而伽藍記則并水經之魏碑以爲漢未可知已靈帝時博士試甲乙科爭第高下至有行賂改蘭臺漆書經字以合其私文蔡邕與堂谿典等奏求正定則所謂三體者以古文篆存頡斯之遺法而以隸書爲俗儒之通用至于魏之三體則承漢而爲之也然漢仍有鴻都一字石經疑卽伽藍記所云表裏隸書者是而隋志亦云一

字石經七種七種之外又有一字石經典論一種典  
論爲魏文所立並稱石經竟列于七經之後又何也  
或者熹平所立爲一字光和所立爲三體耶且隋志  
旣以漢鐫爲邕書而又云魏立一字石經相承以爲  
七經正字遂使後學紛于聚訟如方勺泊宅編云公  
羊傳後馬日磾等名姓乃魏世用其所定之本而存  
之幾不自知承隋志之誤也况隋志所云七種三種  
至唐未必盡亡而唐志止云三字石經古篆兩種曰  
尙書曰左傳反不及宋洪容齋所收尙書之外更有  
毛詩公羊論語三種趙德甫于洪氏諸經之外更有  
儀禮何也且隋志注云梁有今字尙書石經唐志亦

六世爲獲麟之歲董氏曰叔繚作鼎考其文曰惟王二十有三年王在宗周王命叔繚尙書營成周以居商民王歸西周十一世犬戎作難平王始遷曰王在宗周知其在幽王以前也周之歷年久者惟穆王五十五年昭王雖不見其在位歲月以穆王五十受命知昭王在位亦久也此鼎作于穆昭二王之間黃氏曰史記年表宋景公名頭曼漢書古今人表名兜繚孫炎云繚爲頭曼之合聲汲冢師春書宋之世次曰景公繚昭公子也與此鼎合至于攸欵識作微廣川作叔未知孰是然黃氏以爲微字妙也

秦昭和鐘

鐘銘秦公曰丕顯朕皇考受天命奄有下國十有二公按史本紀自非子邑秦而秦仲始爲大夫卒莊公立襄公文公寧公出公武公德公成公穆公康公其公桓公景公相次立于本紀襄公始列諸侯至桓爲十二世銘鐘者景公也若據年表以秦仲爲始則十二世爲康公此鐘乃其公時作薛氏曰犬戎之難襄公夾輔王室平王賜岐以西之地爲諸侯蓋秦仲初未稱公莊雖稱公猶然西垂大夫未立國也所謂十二公者自襄至桓作此鐘者惟景也黃氏曰奄有下國蓋謂始有土之君當始非子雖曰附庸亦國也况有周錫命分土之文耶至成公爲十二世是鐘爲成

公作且十二公者由始祖而下至今爲公之數歐陽以爲先公則作鐘者十三世矣銘之首自稱曰秦公春秋時列國皆然不必以先公爲公也楊南仲謂襄公十二世爲桓公非子十二世後爲宣公董氏曰秦嬴受地襄公名在諸侯其世數可考也秦至成公號爲强大諸侯有國推大前世率以公自列周自后稷十五王不密非王而亦稱之則秦嬴稱公無疑和鐘之作其在成公之世與

照按文公下當有靜公出公當作出子德公下當有宣公

### 叔高公簋

銘曰叔高父作者簋原父曰簋容四升其形外方內圓而小脣之似龜有首尾足甲腹今禮家作簋亦外

方內圓而其形如桶蔡君謨曰禮家傳其說不知其形制故名存實亡此簋可以證其謬廣川云古文高當作郭煮當作旅郭象城郭相通旅猶爲中爲衆蓋人三衆也歟識云叔高父如伯碩父叔邦父之類旅簋不一器也王楚云簋作盂象嘉穀之實三黍稷馨香之氣也

### 周姜敦

古器記曰此敦得于藍田其銘曰伯冏作周姜寶敦蓋穆王太僕正周畿內食采于周者皆周之裔孫耳集古云此敦周穆王時器也史記年表自厲王以上有世次而無年數共和至春秋年數乃詳自穆傳共

孝懿厲五王而至于共和共和至今蓋千有九百餘年斯敦之作在共和前五世而近也古人欲存久遠必托金石然岐陽十鼓皆在而文字剝落惟古器物銘皆全古人用銅不爲燥濕寒暑所受爲可貴也原父又云敦者有虞氏之器周禮有金敦玉敦玉敦盛血天子以盟諸侯金敦盛黍稷大夫主婦以事宗廟此敦是也董氏云按銘文伯百父作周姜敦其器無文飾自命士以上皆得用之夫周之世齊姓重于天下故當時語曰姬姜惟伯禽之弟守采地在王畿內世以周自別如宰周公之類是也其謂姜則王畿之公也平王有子封于汝川亦以周爲氏此之周姜安

知非汝川之周乎伯下一字欵識作自集古讀爲罔  
考古訓作百與廣川同

宋醴鐘

鐘六其銘曰宋公成之醴鐘黃氏曰崇寧三年甲申  
得于南都之崇福院貢之內府考其文則宋鐘原其  
出則宋地聖詔有曰得英醴之器于受命之邦是也  
樂緯叶圖證曰帝顓頊之樂曰六莖宋均註能爲五  
行之道立根莖也博古謂醴卽莖周備六代之樂惟  
五英六莖無之宋爲商後猶得其傳成者宋平公名  
也自微子二十六世而至平公其名始見于魯昭公  
之十年春秋曰宋公成與此合其立也以周簡王之

十年至今崇寧甲申凡一千六百八十年而經之器  
復出本朝受命之地太晟正樂之時豈特爲五行之  
道立根莖哉薛氏曰經鐘五其銘畧無少異特宋自  
微子有國二十世而有其公成又一世而有平公成  
又七世而有口公成所謂宋公成者不知其爲誰也  
廣川曰宋本商後而商出自顓頊周樂用六代猶缺  
莖英疑宋存其禮樂此鐘得而作也襄公作商頌以  
祀成湯閔馬父曰正考父校商之名頌十二篇于周  
之太師太史公曰襄公修行仁義欲爲盟主其大夫  
正考父美之以作商頌韓詩章句曰商頌美襄公也  
馬昭曰宋爲殷後郊祭天以契配宋無園丘之禮惟

以郊爲大祭且欲別之于夏禘故曰大禘然則頌成湯作誼樂其宋之制乎

乙毛鼎

博古曰鼎爲毛羹之用于是乙毛目之薛氏云毛言其姓乙乃號耳

舉鼎

欵識曰晉杜黃洗而揚觶以飲平公謂之杜舉見于獻酬之際其名一字曰舉義或在此黃氏云此鼎非可獻酬之器銘之曰舉乃人名也宋之僖公名舉楚之大夫姓伍名舉蔡有史舉燕有唐舉然史與唐不甚貴又皆周末人驗其銘欵非宋則伍也董彥直以

爲杜舉所作且謂古之制器類有所本晉設解于庭以待直言其後改曰白獸尊豈止供耳目之玩而已按爵有已舉自有丁舉舉之爲類不一自諸家紛紜而鼎舉竟誰屬耶

### 秦權

顏氏家訓曰隋開皇二年之推與李德林見長安官庫中所藏秦鐵稱權有銘二因言史記丞相隗林當依此銘作隗狀集古曰秘閣文同自言游長安得二物其上刻銘一乃銅鍔循環刻之不知爲何器一乃銅方版可三四寸許亦有銘詞其文與家訓正同欸識載前銘曰廿六年皇帝盡并兼天下諸侯號爲皇

帝詔丞相狀綰後銘曰元年制詔丞相斯去疾考古  
云丞相綰者王綰也徐廣曰去疾姓馮古器物銘云  
世傳秦權至多歐公所謂銅綰循環刻字者亦權也  
廣川云田氏有銅方版綰三寸以漢度較之得五寸  
刻二世詔其銅綰刻始皇詔予考之卽古規矩之器  
所以爲方圓者也一權也顏氏爲鐵文氏田氏爲銅  
而趙氏得秦權四其一出濟州又以石爲之何耶

### 石鼓文

石鼓凡十相傳爲周宣王獵碣唐貞觀以後蘇勗李  
嗣真張懷瓘竇泉竇蒙徐浩皆以爲史籀書章蘇州  
韓昌黎載之歌稱述尤詳集古獨設三疑而以韓章

之說爲無据自後辨者曰異如鄭樵則以丞殿二字見于秦之斤權斷爲秦篆董弅則以宣王之蒐狩在敖詩云選徒于敖爲是惟成王有岐陽之蒐杜預謂還歸自奄乃大蒐于岐陽則此鼓作于成王篆爲番吾之跡程氏亦主此說而黃長睿力排衆論釋歐三疑指爲籀作金史馬定國以字畫考之云是宇文周所造作辨萬餘言亦爲黃氏所黜究之金石錄與集古皆云非史籀不能作也唐之虞歐褚三家有墨妙之稱杜工部八分小篆歌序歷代書亦厠之蒼頡李斯之列然而韋蘇州又以爲文王之鼓宣王刻之則其說終未定已

詛楚文

秦人祀巫咸祀大沈久

音

湫祀湮馳其文有三皆名

詛楚宋張芸叟黃魯直各爲音釋集古以楚王之名  
有熊良夫熊商熊槐熊元而無熊相廣川又謂姓書  
熊相爲芊姓如熊相謀熊相宜僚熊相祈似熊相非  
一人之名集古又云自秦穆公與楚成王盟好十八  
世至惠文王與懷王屢相攻伐此文所詛非懷王卽  
襄王也史記懷王名槐槐相字形相近或轉寫之訛  
耳廣川云其文有新郢及郢郢卽商於也張儀以地  
詐楚王齊與楚合在秦惠文時懷王死頃襄王立復  
與諸侯盟約上溯成王亦十八世則所詛者爲襄王

而王順伯乃云此文作于惠文王之後十二年楚懷王之十六年未知何据

### 嶧山刻石

史記秦始皇二十六年兼并天下自號曰皇帝二十八年東行郡縣上鄒嶧山立石遂上泰山封祀並渤海以東登之朶又作琅玕臺二十九年又登之朶三十二年之碣石三十七年上會稽並刻石頌秦功德凡六處史載其詞五者惟嶧山刻辭不載未知此石刻于何時唐封演見聞記云魏武登山使人排倒此碑又云後魏太武亦排之豈阿瞞旣排之後有人樹立而復爲太武所排耶太武之後樹立無人遂至淹

沒也杜甫云嶧山之碑野火焚棗木傳刻肥失真似與封氏所云歷代模拓邑人厭苦積薪焚之之說合而集古則云以李斯所篆泰山數十字相較真僞立見則所傳刻屬贗本不止在肥瘦間矣廣川云唐人嘗取舊文勒石故謂後世所摹皆新刻夫唐人既刻棗木不應更有他刻趙氏則云鄭文寶得徐鉉模本刻之長安予所收者是也雖傳摹之餘亦自可貴而集古又得別本于青州字畫差小雖不類太山存者以爲古物難得聊資博覽似遠勝于前刻矣爾雅云嶧山純石相積連屬成山予于戊午秋登之果如所云求始皇立石處渺不可得若云野火焚碑尙有疑

焉

石經

石經之立也一見于范書靈帝紀爲漢之熹平一見于晉書衛恒傳爲魏之正始其刊定有數漢紀云詔諸儒正定五經其立處有地水經注云立于太學講堂前漢碑在東側魏碑在堂西其書法有體儒林傳云爲古文篆隸三體以相叅檢水經又云正始中立古篆隸三字石經與衛恒傳合其書丹有人楊街之維陽伽藍記云漢國子學堂前三種字石經右中郎將蔡邕之遺跡也隋志亦云漢鐫皆邕書魏江式傳謂魏立三字石經爲邯鄲淳書其存毀亦有紀載陸

機洛陽記曰講堂長十丈廣二丈堂前石經四部本碑凡四十六枚西行尙書周易公羊傳十六碑存十二碑毀南行禮記十五碑悉崩壞論語三碑二碑毀上有諫議大夫馬日磾議郎蔡邕名試詳諸說似乎無復可疑然而水經則曰光和六年立石與熹平四年異矣晉書裴頠傳轉國子祭酒奏刻石經似又不止魏之正始若靈紀儒林宦者諸傳皆曰五經蔡邕張馴傳乃云六經隋書經籍志又以爲七經何也楊龍驪洛陽記載朱超石與兄書曰石經碑高一丈廣四尺駢羅相接竊意漢魏諸碑如伽藍記所云約七十餘石似未必盡列于堂前謝承漢書曰碑立太學

門外瓦屋覆之而黃長睿東觀餘論又云在洛宮前  
御史臺中堂前門外旣已無定所謂御史臺者未知  
卽漢之太學所改抑後代遷立于其中也况洛陽記  
之四十六枚不言爲漢爲魏伽藍記之堂前所列不  
分在東在西得無洛陽記但指漢碑而伽藍記則并  
水經之魏碑以爲漢未可知已靈帝時博士試甲乙  
科爭第高下至有行賂改蘭臺漆書經字以合其私  
文蔡邕與堂谿典等奏求正定則所謂三體者以古  
文篆存頡斯之遺法而以隸書爲俗儒之通用至于  
魏之三體則承漢而爲之也然漢仍有鴻都一字石  
經疑卽伽藍記所云表裏隸書者是而隋志亦云一

字石經七種七種之外又有一字石經典論一種典  
論爲魏文所立並稱石經竟列于七經之後又何也  
或者熹平所立爲一字光和所立爲三體耶且隋志  
旣以漢鑄爲邕書而又云魏立一字石經相承以爲  
七經正字遂使後學紛于聚訟如方勺泊宅編云公  
羊傳後馬日磾等名姓乃魏世用其所定之本而存  
之幾不自知承隋志之誤也况隋志所云七種三種  
至唐未必盡亡而唐志止云三字石經古篆兩種曰  
尚書曰左傳反不及宋洪容齋所收尚書之外更有  
毛詩公羊論語三種趙德甫于洪氏諸經之外更有  
儀禮何也且隋志注云梁有今字尚書石經唐志亦

有今字石經豈卽以三體中之隸爲今字抑別有所謂今字之體耶隸釋云所存諸經字體不一雖中郎能分善隸但文字之多恐非一人所辦今公羊傳後堂谿典馬日磾二人姓名固存別有趙臧劉宏張文蘇陵傅楨左立孫表數人竊意其間必有同時揮毫者則隋志皆屬邕書之說似非篤論衛恒云魏初傳古文者出于邯鄲淳至正始中立三字石經轉失淳法因科斗之名更效其形漢書云元嘉元年度尙命淳作曹娥碑時已弱冠自元嘉至正始越九十餘年洪氏謂淳書石經者非則江式傳所云更屬難信已伽藍記云三種字石經二十五碑表裏刻之寫春秋

尚書二部復有石碑四十八枚亦表裏隸書寫周易  
尚書公羊禮記四部又讚學碑一所並在堂前魏文  
帝作典論六碑太和十七年猶有四碑高祖題爲讚  
學里碑之數視洛陽記餘三分之一而洛陽記反多  
一論語何也後魏所存較前必少而北齊文宣帝紀  
尙有五十二枚則僅毀伽藍記之二十有一隋志乃  
云齊宣徒碑至鄴不盈大半又何也去古旣遙遺經  
淪落殆不可問予幸及見于都門孫侍郎硯山齋中  
爲烹平舊刻止存尚書盤庚篇三十餘字論語爲政  
篇七十餘字堯曰篇二十餘字其他斷石或尙在人  
間惜無摹勒之者如宋蔡望氏刻于洛陽洪适氏刻

于會稽胡宗愈氏刻于錦官樓使鴻都古墨流行字  
內姑存數語以俟博聞多識者云爾

黃陵廟碑

山海經云洞庭之山帝之二女居之自古謂二女者  
舜之妃娥皇女英也郭璞以帝舜之后不當降小水  
爲夫人因以二女爲天帝之女韓昌黎黃陵廟碑非  
其說黃長睿云凡山海經言帝者皆天帝如列仙傳  
江斐二女與湘君湘夫人稱帝子者是似以璞之說  
爲可信然以二女爲湘君者秦博士對始皇之言也  
劉向鄭元因之則二女無尊卑之義得並稱君離騷  
九歌于湘君之外復有湘夫人王逸解之乃以湘君

爲湘水之神而以湘夫人爲舜妃則二女俱降爲夫人矣而九歌又稱娥皇爲君女英爲帝子似前所謂湘君湘夫人者另有其說而非二妃也昌黎集本皆云不當降小君爲夫人歐陽公云家藏本最善而碑云降小水之類當以碑爲正然韓碑有小君君母明其正自得稱君之語似石本小水或誤蓋承王逸湘君爲水神之解而異之耳邯鄲淳曹娥碑云若堯二女爲湘夫人又承逸解而異于劉鄭也或以爲君或以爲夫人或以爲水神或以爲天帝之女文人好辯吾烏乎定之

金石錄補卷二十七

崑山葉奕苞九來著

襍記

宛平孫北海先生名承澤官吏部侍郎家在京師前門之東藏金石文數十函題曰墨緣重輪手自標題印硯山齋圖書記客至焚香展玩言不及塵世事子樓字茂叔有乃父風

北海藏王右軍真跡墨跡佳一一致君所須可示勿難當以語虞令凡一十九字元兵從南宋內府簞以入燕者前有亡宋南廊庫經手人郭壘印記而鴈其名盛元中書省檄諭中外江南旣平宋宜曰亡宋斯

人直書此二字而名不存豈其有深意耶

唐靳英希誌銘石碑于崇禎末年出潮縣錠子村碑下有瓦杯三其色如秋山著雨作純碧色光浮灑漱杯中各有紅點如桃花藏于孫氏之壻而石歸硯山齋中

唐李輔光墓在咸陽縣東北近涇水萬歷中涇岸崩擁水不流三日乃得誌石其銘曰水竭原遷斯文乃傳適符其語奇矣

吾邑寺觀多齊梁間建慧聚寺尤著有天王堂記碑唐王洮撰宋淳熙中燬于雷火寺柱四皆張僧繇畫龍火後二柱忽有天書其一若大篆曰勸煥火三字其

一蟠結若符篆不可識今已蕩盡矣洪武三年改寺爲邑神廟今歲秋大雨西廡地忽陷發之得尊勝石幢立于北宋咸平五年壬寅去今庚申蓋六百七十九年沒于地者亦三百年矣書仿虞褚多風姿予攜植薦嚴寺中

唐郭君墓在汾陽縣北七十里郭社村秀水朱彝尊字錫鬯過之行溝中仰見土岡之上碑額微露築蹇而登迴環數里始至碑下命從者拓之又在村中掘出任君墓碑劉府君碑錫鬯同曹侍郎歷燕晉之間訪得古碑不憚發地數尺而出之從者皆善摹搨及裝潢諸事文人好古近罕儔匹侍郎名溶時稱秋嶽先

生

漢魯孝王五鳳二年石刻在曲阜縣夫子廟奎文閣壁間櫟園先生惠子拓本云某所藏較俗本迥異子至廟下攜以相較果然或曰櫟園官山左時有人翻刻此石易原石去未知果否櫟園姓周名亮工河南人山東平度州北五十里天柱山有後魏鄭道昭銘此朱錫鬯所記也考趙錄有道昭登雲峯山詩未知卽天柱山否

石鼓凡十相傳爲周宣王獵碣關中郭宗昌允伯則以爲與鼓形了不相似視少華山前石之堅潤者相類然韓昌黎作歌至云陋儒編詩不收入二雅編迫無

委蛇吾邑顧炎武疑其文淺近不足儕于二雅以韓詩爲已甚且据金史馬定國言是宇文周所造又引楊用修云宣王之世去古未遠宜用蝌斗籀文今石鼓文類小篆此皆文人好異多置辯詞要之其文與書總非晉魏以後所及今在國子監文廟戟門左右守廟人索錢頗橫予典衣應之同嘉定孫愷似侯大年吳江周惟彥摩挲甚久嘆息而出

孔穎達碑螭首嵌空處有至正四年三月顧游特看此碑墨書十四字趙岫子函云在泥土中拂拭之如新子函見時爲萬歷戊午溯至正甲申已二百七十五年而墨書無恙斯足奇也子函又云成道宮龍虎殿

爲元構左壁上有字兩行云粧變功德主本宮提舉  
孫道和曹漢臣塑胡君貴粧至順三年十二月三日  
較前甲申又加十二年而字未磨滅不得趙先生其  
能顯于後耶

太原縣風峪洞中有北齊石刻佛經一百二十柱曹侍  
郎皆揭之字殊醜劣而無書人姓名故不錄

杭州淨慈寺西壑菴後石壁上刻家人卦乃唐人篆書  
相傳爲司馬溫公手筆無定評亦不錄

秋嶽先生倦圃收藏古今碑刻名金石表約數百種仿  
趙氏例自周秦至五代錄入表中侍郎語予云宋以  
後當另爲一錄而未暇也

孫茂叔爲曹侍郎壻故硯山齋所藏有歸倦園者如丁  
道護書啟法寺碑王元宗書華陽觀王先生碑皆人  
間少有去年春于京師見之今復見于檣李云  
後晉史匡翰碑在太原縣王陵庄曹侍郎遣人掘地丈  
餘始出又在裴晉公墓旁掘得一碑

泰山無字碑在絕頂高三丈餘闊四之一色微黃光潤  
如蠟或云下有金泥王檢以此石冒之相傳爲始皇  
立顧寧人力辯其非定爲漢武立余與徐季重家敷  
文徘徊其下忽蒸雲如絮頃刻間人不相見在雲氣  
中猿臂蟬聯而下甫下山頂雨飄飄然至矣

唐岱嶽觀在泰山之東南麓王母池上今存小殿三楹

俗稱老君堂前有二碑皆唐時建醮造像之記予回環讀之兩目酸楚足徵精力之耗碑下發土二尺許詢之廟丁則吾邑顧亭林所發也苟非亭林好事必就湮沒矣

泰山御帳坪之南有石經峪石如平臺舊刻金剛經後人刻大學蓋其上字皆徑尺黃花洞內有唐人題名與白蝙蝠詩

唐李存進碑在太原縣鄭村僅露碑頂秋嶽發之樹大道上

山東益都縣南陽寺有北齊無量壽佛碑大雲寺有李邕碑蒙陰縣書堂社有磨崖石刻古文南樓社太清

觀有唐碑莒州孝源泉有唐碑青州府堯山有朱誕  
撰堯廟碑臨邑縣孫耿鎮慧日院金剛香座有歐陽  
詢遺字彌陀寺有初唐石幢鄒平縣西南五里有後  
周景範碑長白山有唐建寶誌公碑壽光縣南十里  
張孫社有魏侍中司徒賈公碑濟寧州東三十里有  
唐章仇府君碑以上諸碑皆得于顧寧人朱錫鬯兩  
君紀述予兩至山左未能一一訪而搨之記此以俟  
異日

冀州磐山上方寺有唐碑二涿州文廟前有唐碑一陳  
謨公許拓以見貽久而未至

太倉吳氏以褚河南書文皇哀冊文真蹟索售在順治

初年價不甚昂留子齋三日紙墨如新後有宋思陵  
題字及米友仁審定諸跋惜囊中無阿堵舍之病至  
累日

先大夫購得米元章捕蝗帖上通判書真蹟共三幅爲  
白下陳于一強求贖去歸王長安子留其一復從宋  
閔叔處以十千錢得蘇長公真蹟四十字知爲顧氏  
物仍歸子豐

曲阜縣舊城東爲少昊陵陵下臥崇碑四五處高大異  
于常碑土人云皆金天會皇統間欲追宗金天氏爲  
始祖而製因循至後不果立也

唐張長史旭書郎官石柱記王弇州先生云人間止有

兩本其一藏都少卿穆家子從亂後得并州藏本始知長史正書在草書之上

秦晉間古碑皆爲營繕解字塔廟所用或土人厭苦官長誅求磨滅毀損如漢華嶽廟碑有郭香察書四字者嘉靖中猶存一縣令脩廟門少砌石視殿上碑題皆當時顯者不敢動以此碑剝落斷而用之見石壘鐫華

南唐周彥崇記孫權時金陵牛頭山自裂有僧出其中謂文殊辟支佛保大中緣崖而西建佛窟寺碑爲王秉文書又幽棲巖上有延壽寺斷碑爲唐大歷中僧靈樽書洪武間危太僕尙見二寺舊碑今無有問之

者

泰安州岱廟中古柏相傳漢元狩間植龍蔥如葢皮裂  
綻皆左紐柏下一碑根盤覆不可拓土人云係唐人  
建東西碑亭漸毀宋徽宗明太祖兩碑最大庭中大  
檜下一碑爲今巡撫劉公芳喆代祀立長逾中人徐  
季重訝其陋家兄學亭云前明立碑有公費近奉裁  
革劉不欲擾民因其便故也立碑時家兄適署州篆  
而知其詳

明人錄金石文者惟都少卿穆金薤琳瑯見碑錄文雖  
少而妙又錄宋元人題跋如潘乾校官碑是也楊升  
庵金石文徐獻忠金石古文竟錄蔡中郎輩集內文

字不必親見此碑故不足貴

崇禎末流賊寇山左入曲阜縣盜大成殿犧象二尊行五十里負尊者暈眩倒仆又一人代負亦倒于是送還廟中倒者立愈

吳季子廟在丹陽延陵鎮越絕書由毘陵上湖中湖中冢者季子冢也又名延陵墟廟記碑唐刺史蕭定撰後人摹刻于縣內驛前

泰山絕頂碧霞元君宮之東廡秦始皇二世刻石存二十九字州城內岱廟中別刻一石其文同按宋劉跋序秦篆譜時尙存二百二十二字今止十之一宋本不傳久矣惜哉

或謂碑起于漢不知周時已有之檀弓公室視豐碑註云斲大木爲之形如石碑于槨前四角樹之穿其中間爲鹿轅下棺以絆繞之劉熙釋名碑被也王莽時設豈未見檀弓也耶

漢碑上有一孔在墓則引棺在宗廟則麗牲祭義君牽牲旣入廟門麗于碑註云麗繫也至聘禮賓自碑內聽命又曰東西北上上當碑南此爲賓揖之碑也

古者臣子追述君父之美輒書碑上後人因之建于大路之旁其見之處然予所見曲阜夫子廟濟寧州學溧水校官諸漢碑高不逾丈空其中間必爲引棺麗牲之用今旣失其制而碑之高大至于無度與古碑

異矣

漢西嶽華山碑在華陰縣嶽廟中嘉靖三十四年地震碑毀惟郭允伯藏宋拓本文字完好今歸華陰王山史家郭名宗昌有金石史考據辨論多所發明王名宏撰以薦至京師與予定交昊天寺中

太原傅山字青主曾行平定山中誤墮崖谷見洞口石經甚多皆北齊天保間刻字然無名筆亦未有搨之者

宋周益公得漢光武時梓潼扈君墓碑隸書始知東漢誌墓用碑後乃刻石也

泰山絕頂有石高四尺許純碧色硃砂文兩行自上貫

下最爲奇燦不識何人鑄聰明正直四大字遂減此石生氣

趙州衙署南門卽古之望漢臺蓋耿純築此以望光武之至有石刻望漢臺三字

長洲范氏藏唐咸通二年柱國范隨誥文正公云祖宗積德百餘年始發于吾今觀此誥蓋二百年本原深厚如此自文正至今又數百年而此誥無恙文獻足徵豈特有國者然哉

蘇州萬壽寺藏古銅鼎其識有周康穆宮錫宴用鄭伯姬等語元大德中任陽謝氏欲以玉杯易之住持默公不從謝氏後建佛殿予之至正丙申謝遭兵失鼎

甲辰愚隱智公復得于軍人之手者舊皆曰山中物也歷百年至天順間猶存

宋虔州天竺寺有白樂天手書詩云一山門作兩山門兩寺原從一寺分東澗水流西澗水南山雲起北山雲前臺花發後臺見上界鐘清下界聞遙想吾師行道處天香桂子落紛紛蘇長公云予年十二先君謂予言此詩墨蹟如新筆勢奇逸今四十七年矣予來訪之則有石刻在耳文忠去今六百餘年未知此石在否

通州學宮古佑聖教寺有塔塔前存石一方唐貞觀中尉遲敬德脩過沙河二十里有新井庵祠狄梁公道

上有二石幢字類李北海亦貞觀中立

房山縣西南四十里曰白帶山又曰懋題山藏石經唐金仙公主脩之有隨碑二仁壽元年王臣陳宣卽智泉寺舍利塔銘也又王邵撰舍利感應記碑亦仁壽元年立唐碑五開元中王大悅碑梁高望碑元和中劉濟碑景雲中寧思道碑太極中王利貞碑

吾郡城內平江路一帶傳聞有承橋柱石盤上係漢人題識朱臥庵約于水涸時訪之

閩人余天茂爲陝西某府別駕好尋古碑同屬下士某減騎從至終南山下古寺中僧初秘惜天茂出白鏹餉之乃引至寺後越壞厠廁側小坡上臥十餘石皆

唐人墓誌世不及知者揚之歸僧云從近處古墓中  
出恐當事擾累故秘之臥庵云

湖中雙塔二石幢皆尊勝陀羅尼經咒爲錢鏐時建有  
歲月而無紀年

徽州汪宗孝收藏金石古文法書名畫彝器古玉甚富  
歿後散落人間獨手書目錄猶在其子權奇裝潢成  
帙求虞山錢宗伯題識宗伯以長歌答之宗孝字景  
純富而任俠萬歷間嘗臥病受命于文廟遣治水江  
淮間七日而寤楚人王同軌作耳譚載其事

唐有兩懷惲一張姓示滅于大足建碑于天寶今在錄  
中一謝姓示滅于元和二年十二月廿二日諡曰大

覺建碑灞水曰大寶相塔碑而趙錄失載郭允伯金石史有此碑名而其文無考惜哉

松江靜安寺在華亭縣西北十里有赤烏碑見陸巖山外集

楊升庵云四皓有羽翼太子之功其沒也惠帝爲之製文立碑文獻通考通典皆不之載歐陽集古錄趙氏金石錄鄭樵金石畧皆遺之而見于任昉文章緣起宜興徐氏藏唐虞世南奏草真蹟中云伏蒙聖慈以臣進呈孔子廟堂記石本特賜臣晉右將軍王羲之黃銀印一顆臣已祇受蓋在貞觀七年十月後有宋人題名及賈丞相悅生印予于順治庚子三月至宜興

寓徐太守懋曙齋問此帖云在族人家適以採茶入  
山子不能待而歸聞徐文貞公已勒石將訪而錄之  
鄒少卿云張長史真蹟書春草詩云春草青青千里餘  
邊城落日見離居情知海上三年別不寄雲間一紙  
書此帖用白麻紙宋秘府物元季藏吾鄉陳彥廉家  
陳構春草堂人多作詩咏之今歸嘉興王廷槐長史  
爲唐人法書第一子于順治己丑聞嘉興徐次桓云  
神廟中年王氏將此帖轉售勢家屬善雙鉤者鉤一  
通欲上石而不果云

宜興善卷洞有咸通八年昭義軍節度使李蠙贖寺碑  
載先石林公避暑錄石林公藏古碑千餘帙爲金石

類考五十卷則吾家世世好金石文字也

縉雲縣東四十里有仙都觀相傳黃帝煉丹其上後爲道院唐李陽冰爲縣時書黃帝祠宇四大字宋末猶存

陶宗儀古刻叢抄有豔陽仙洞四篆長一尺許字極古秀又有康王神道之碑六字似漢以後人篆書長五寸許皆不詳其所在不錄錄自漢至唐五十餘碑在江南者十之一去陶已三百餘年諸碑必皆湮沒卽毘陵雲間相去甚近屬屬友人博訪渺不可得況世無好古者陶氏所抄亦將付之羽蠹可勿惜哉

元元貞中長安人駱天驤分類編長安志第十卷載碑

目跋自周至唐其百碑爲趙所遺者三十碑子皆補入錄中蓋駭去趙未遠且身歷碑下摩挲把翫其跋臧崇云臧氏七碑于至元十五年親披荆棘手自拓錄更有數碑叢刺難造未及抄寫爲恨然則物之顯晦固自有數遇好事者名聞于世偶一厭倦如臧氏七碑之外滅沒者不少天驤字飛卿爲京兆路儒學提舉

陳先生家太倉之雙鳳里知子作錄補特見報云里中法輪寺前後石橋凡四處橋柱下皆有題字乃永和九年王羲之之蹟于順治中爲寺僧穆文拆毀石尙有存者寺內石井欄題字與橋同先生名涑字就列

子蒙師也誠實不妄俟秋涼往拓之第右軍遊歷未必至此或後人摹勒托其名耳顧伊人又云咸和年間物非永和也未知孰是

宛平劉某知鎮江日購得閣帖夾雪本蝨食其墨以素紙裝之如六花之散于几席也朱錫鬯云棗林既裂櫃以銀錠是本裂處以木補之殆在未櫃之先此賜本之僅存者舊藏顧大理家後歸蔣氏未知劉得之于蔣否也

去邑南二十餘里有土山曰趙陵亦曰趙靈上有寺大中十年建聞有唐碑沒在吳氏菜地中拏舟訪之發吳氏壁得斷碑三段洗剔視其文乃洪武年

撰記大中碑甚悉寺僧乎尹許爲搜討姑俟之

北史江式長于篆體撰集古今文字凡四十卷大約依許氏說文上篆下隸惜其書不傳如式所著甚多在歷朝經籍志中今皆不存

漢碑書撰人姓名多不著而造碑之人時附碑末如石經論語工陳興三公山碑石師劉元存無極山碑石師闕白石神君碑石師王明孔耽碑治石師同縣朱適朱祖武氏石闕石工孟季季弟卯綏氏校尉熊君碑碑師春陵程福巴郡太守樊敏碑石工劉盛息懌書李翕鄱閣頌石師南闕字成民蓋漢人立碑刻鏤精工有費至十五萬者梁碑後云孝子孝孫躬修子

道謁家所有選擇名石南山之陽擢取妙好色無斑黃良匠衛改刻雕文刻畫羅列成行攄騁伎巧委蛇有章可見當時鄭重故石師必欲自炫其技而貽名于後也

漢碑多刻門生故吏非是二者爲處士故民之類然有義士義民賤民議民復民義工義徒等名至劉熊碑有好學四十餘人德行一人更有稱順人者在百蟲將軍顯靈碑

雲間陳徵君眉公藏唐顏魯公所書朱巨川告身顯光祿有唐時兄妹共寫法華經七卷後題云燕子女丁先大夫從陳氏頑仙廬見法華經楷法甚工細如蠅

鬣若出一手比巨川告爲尤異洵乎唐人善書而不得其姓名爲可惜至燕子女丁無有知其義者

錢鏐常于林屋洞投金簡宋淳祐丁未七年大旱山間人于水濱得之長一尺五寸濶六寸上刻字曰天下兵馬大元帥吳越錢王十一字

陳眉公云安東縣金剛嘴不知築于何時殘磚上有尉遲公等數字

吳縣盤門外孫堅同妻吳夫人及孫策三墓宋政和六年村民發之墓輒皆作篆隸書萬歲永藏四字碑石斷缺僅餘中平年三字按英雄記堅以初平四年正月七日死非中平也或是吳夫人前卒耳又紹熙二

年秋雨隕圯牧童入其隧道得銅器數種鄉人往視之有石刻隸書云大吳長沙桓王之墓赤烏二年凡十二字按吳志孫權卽皇帝位追尊父破虜將軍堅爲武烈皇帝母吳氏爲武烈皇后兄討逆將軍策爲長沙桓王在黃龍元年此云赤烏當是又十年而立碑也又宋嘉興年間于墓旁土中得唐孫德琳誌云開元十年迄于十四代祖吳武烈皇帝陵東南平地聞此誌尙在吳門巨族屢訪不得姑記之

漢人碑文云某君之孫之子不著祖父諱隋唐以後率直書之如陳子昂顏魯公白樂天序先世名并不加諱字竊笑今之人事事不及古而狀祖父行畧必屬

戚友填諱偶得宋人黃裳墓誌乃其孫中美所撰末云婿進士吳容填諱在光宗嘉定之三年此風固已久矣

唐宦官楊思勗父楊歷碑鍾紹京撰文自稱爲義男按紹京出于胥吏致位宰相乃以諂諛之私父事宦豎勒名金石全不知耻信乎士君子之所以不朽者在德不在藝也紹京雖擅能書之名詎能掩此辱身賤行耶

邑先達顧文康公諱鼎臣藏虞伯施所書夫子廟堂碑其額有大周二字文康所印私記一鼎中間以數臣字作回文式又有味齋印此唐搨也碑立于武德九

年無額武后命相王旦補書之相王者睿宗也至文  
宗時從國子祭酒馮審請琢去周字故以後止有夫  
子廟堂之碑六字爲題未知文康得之誰氏又有聖  
教序未斷碑與今碑迥異

甲申燕京陷後有監子插稻草爲標持宋榻蘭亭求售  
胡井研以三十錢易之乃游丞相家經進本也嘗熟  
口宗伯瞿得四紙予曾見之

徐州有關壯繆竹石刻宣德四年僧正廣善創建鐵佛  
寺剎地得之司徒趙欽湯曰侯所寫竹虬枝鐵幹其  
葉錯綜成文爲五言一絕句不謝東君意丹青獨立  
名莫嫌孤葉淡終人不凋零或曰此侯降虜筆也今

石刻在肥城關壯繆廟中

朱錫鬯云涿州樓桑村有唐碑無書撰人及建碑年月  
偶閱金章宗承安四年涿州蜀先主廟碑云涿先主  
之故家也廟距州西南十里而遠有唐乾寧四年重  
修碑記因屬真定陳僖揭之

溧陽縣東南一里報恩寺後有石井欄刻云唐元和六  
年零陵寺比丘澄觀數十字又冶山寺雲版得自山  
田中有唐貞元二年等字以不成文不入錄

茅山華陽宮有陶隱居井宋政和初道士莊愼修浚之  
得瓦井欄已破合之尙全環刻大字云先生丹陽陶  
仕齊奉朝請壬申歲來山棲身高靜自號隱居同來

弟子吳郡陸敬游其次楊王吳戴陳許諸生供奉堦  
宇湖熟潘遷及遠近宗稟不可具記悠悠歷代詎勿  
識焉梁天監三年八月十五日錢唐陳宣懋書又得  
銅爐有柄今藏宮中

周櫟園

亮工

云恭順侯吳某藏古碑千餘種予過其墨

響齋屋壁皆滿吳有金石文一編錄全文備考孫北  
海硯山齋自秋嶽倦園郭孝廉傲山樓收藏皆不及  
吳十之一

江寧府麒麟門外墳頭山中有大石長五丈餘濶半之  
土人云是明初孝陵碑料旁一石如小山云是碑座  
此石側立可以晒麥百担

鄭谷口

舊

云山東城武縣有漢張壽碑已斷爲俗令去

思碑跌于通碑下見之白諸縣起而樹之署壁

吳漢槎

光緒

云寧固塔卽金之會寧府也去黃龍府尙

遠一千五百里金曰上京有紫金城城西南角一百  
二十步有碑已斷磨滅不可辨剔垢讀之識三句僞  
風盛于東觀俯囑關廷深契朕懷後云天會某年月  
遐荒漢字惟見此碑而已

顧伊人

涓

從廬山歸云

見一碑泉涓涓在碑下出

碑篆神功泉三大字非唐以後人筆許竹隱虬罷永  
州太守云柳子厚鉅鉤潭上有巨石鑿鉅鉤潭三大  
字亦非俗筆二碑惜無年月姓氏錄入

竹隱有潭記

黃編修忍庵

與堅

黔中典試歸云游桃花源洞止見杜

牧之一碑亦趙錄所遺惜未竭之

吳郡城西二十里有大塚土人稱爲歸王墓宋嘉祐中居民懇土得石如柱礎方一尺五寸厚二寸許中隆起二寸有八分書三行云唐故陳留郡夫人言氏墓誌九字按圖經唐山西南道節度使歸融葬地融未嘗封王土人之稱誤耳聞此石尙在土人鍾氏家中萬歷初元會稽倪簡冢地內掘得晉太康間冢中杯及瓦券券文云大男楊紹從土人公買冢一邱東極關澤西極黃藤南極山背北極于湖直錢四百萬卽日

文舉日月爲證四時爲佐太康五年九月廿六日對  
其剪破民有私約如律令柳元穀以是二物易徐文  
長畫雲間范武功詳玩右文卽今祀后土之券版耳  
後世未嘗以文鐫刻而此刻于瓦歷千有餘年不毀  
爲可異也

張東海先生汝弼卜葬九峯之鳳凰山發穴得一碑云  
費將軍之墓碑後蓋棺有大石石上有並受其福四  
字張氏卽于字石上疊石加磚舉東海樞安葬至今  
至范武功云

康熙甲寅之夏常熟縣開城河得一研如今之方磚兩  
旁有足其右已損銘文八分云松操疑烟楮英鋪雪

金石錄卷二十七  
豪飲如飛人間四絕順義元年處士汪少微識按順  
義爲吳睿皇楊溥紀年也元年歲次辛巳去今凡幾  
百年至明戊申四十七年而溫潤如初出坑者家林宗以二  
百青蚨售之研質雖石從未有入金石譜者附記焉

金石錄補卷二十七

海昌蔣光照校